

## **Ka vākā tievū neklausa**

Vākā, miestūs esētāisē,  
Gīvena kap bajuorā.  
Tievā kaimē porva braida,  
Anēms tor derietē bikuokēi uorā.

Tievā praša atvažioutē  
Pri daržū a šēina –  
„Mes, brongējē, netorem laika  
Nē vakarē, nē dēina...”

Par dēina saulē rētiniejēs –  
Rēk skobietē i pliaža.  
Vakarē – tetra, koncerta paveizietē  
A so draugās i garaža.

Tievā sūra prakaita brauk,  
Darboujēs kēik begal.  
Atvažioujint vākū lauk,  
Vo darbams vēs nier tuo gala.

Vēina rīta muotina skombēn:  
„Vākā, pjausem kiaulē!”  
Vākā vēns kēta tik skobēn –  
Mat anou šonis ē tou saulē.

Pēlns kēms privažiava  
Poikiū mašinieliu.  
Va, būs viedarū, mēselēs,  
Kumpiu ē dešreliu.

Tievs kēimē atsēstuojēs  
Liūdna žēnē tarē:  
„No, ta kiaulē nelabuoji

Koiliu ožsēmanē!“

Eisem, vākā, malku pjautē,  
Torem daug darbieliu...  
Tou kiaulē nujaus negal pjautē –  
Būs neskanī mēselē.“

Vo tēi vākā sosēžvalgē –  
Prēsēmēnē sava biedas ...  
Net nē pēitu nebevalgē –  
Ēšdolkiejē i miesta.

Vēinam televizuorius i jungts palēkēs,  
Kēts neišjungē pruosā,  
Trets ondēns neožsokēs –  
No gali ēšeitē ēš pruotā!..

Pīkst muotina ont tieva:  
„Kou to padarē?!  
Pats kap kiaulē, to, begiedi,  
Vākus ēšvarē!“

Tievs sopīkēs tvērtā tarē:  
„Je tievū neklausa,  
Miesta mūrus ožsēdarē,  
Lai griauž douna sausa!..“